

Fasnacht 2018

D'Luuser Waggis 74

Syt 2001 zämme mit de Verschnuuffer



Sujet: Uffdaucht — mir niele im Bach

Z Basel am Rhy — do mecht e jede gärn syy ...
und bim ene Schwumm isch tout Bâle mit derbyy!
Wenn s haiss isch — es isch kuum z bischryybe,
losst sich dr Bebbi im Bach lo dryybe.
An dr Rhywiera seesch si grille und tschille
und mit Sunne dr Vitaminspaicher fille.

Doch dr Babbe Rhy het zwai Visage,
hietet Ghaimnis und Blamage.
Dief im Wasser, uff em Grund,
ligt e männgge doote Hund.
Liebesbrief, wo nit derfe eggsischdiere,
Bangbeleg, wo me lieber will verliere,
bruuni Reggwisyttte, wo me nit will bhalte,
dyynt Selfies zämme mit dunggle Gschtalte.

Dr Bach isch wie dr Byychtstuel bi de Pfaffe,
wo me si Seeleheil mit sich ka schaffe.
Muess me dr Bach denn wiirgglig butze?
Gits do druss e grosse Nutze?
Isch es dr Wärt, im Bach go z niele
und dr grossi Drägg uff z wiele?

Mer findet deert — jetzt muesch guet loose,
em Baschi Dürr sy Haschisch-Doose.
E Saisonkarte findsch im Bett
vom Karli O. fir e FCZ.
Dr Wessels wird uff aimool blass —
mir finde au sy Waggisbass.
Uff dääre Kasette — ych kennt wette,
heert me dr Juillard an dr Glarinette.
Im Kembser Räche — so wird brichttet,
het me dr Maischterpot vo YB gsichttet.
S daucht uff vom Brutschin — jeemynee,
sy alts Barteibuech vo dr SVP.

Vyyl isch uffdaucht, wo miir dängge,
me sottis schnäll wider versängge.
Dr Soggebob mit syner Pseudo-Stimm,
dää bruchti Basel sicher nimm.
Versänggt wird au d Frau Müller K.
vom Tele Basel bla bla bla ...
Dr Margrethstich, dä isch scho gsungge,
daas hett dr Pegoraro gstungge.

Syt dausig Joor und vyyl lenger wirts sy,
gheit dr Bebbi sy Blunder in Rhy.
Em aint und andere kenntis gruuse!
Hösch, was kunnt doo alles uuse?
Drootesel, Grill und Konsiwäägeli,
im Bach seets us grad wie bim Tinguely.
Nuggi, Dildos, Biis kasch finde,
s Fangyyse vo dynere Zimmerlinde.
Wysse Schnee — däa gheert nid mir!
Schwarze Afghan — isch däa vo dir?

E jede Birger het sy Lyyche,
deert dien sich alli Mensche glyyche.
Was wird me kinftig lo verschwinde?
Sells in hundert Joor denn ebber finde?
S kennt vilicht vyyl gscheiter syy,
es blyybi fir immer dert, im Babbe Rhy.

www.luuser-waggis.ch

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne sin
vom Määntig znacht bis am Mittwoch demoorgel!